


TEZAUUR LITURGIC

16 DECEMBRIE

**ACATISTUL
SF. CUVIOASE
SOFIA
SABUROVA
DE LA SUZDAL**



MOSCOVA, 2000



Акафист преподобной благоверной великой княгине Софии Суздальской

Кондак 1

Избранней Божественным промыслием славней подвижнице земли Суздальския, преподобней матери Софии достойную честь и похвалу воздадим, яко святей угоднице Божией и усердней молитвеннице о всех почитающих ея пречестную память. И ныне припадающе к ея святому гробу со умилением зовем: Ра?дуйся, богомудрая мати Софии, прехвальная молитвеннице земли Суздальския.

Икос 1

Ангелов лики возрадовашася, видяще твое иноческое житие в подвизах поста, бдения и богомыслия, и яко единоправную прияша душу твою, достойно венчанную чином ангельским в пострижении монашестем, да будеши образ жития во Христе всем ищущим спасения. Темже воспеваети ти:
Радуйся, прославленная подвижнице, Богом избранная;
Радуйся, Христа Подвигоположника всем

сердцем возлюбившая.

Радуйся, к ангельскому лику монашеским чином
сопричисленная;

Радуйся, чистоту душевную неустанными
трудами стяжавшая.

Радуйся, с небесными силами Господа
Вседержителя воспевшая;

Радуйся, Бога Творца всяческих мудрость
познавшая.

Радуйся, промысление Вышняго на себе во
благих испытывавшая;

Радуйся, Его Божественной воли всю себе
предавшая.

Радуйся, богомудрая мати Софие, прехвальная
молитвеннице земли Суздальския.

Кондак 2

Видящи злострадания жительство в мире сем,
волнами житейского моря обуреваемем,
презрела еси всяческую тленность благ земных:
богатства, власти и чести, и в надежде живота
вечного оставила еси славу великокняжескую, в
благодарении поющи Богу: Аллилуия.

Икос 2

Разумеючи вся суетная и скоротечная в мире
сем, покорила еси себе, яко кроткая агница,
воли Всемогущаго Бога и, взявши крест на рамо
свое, понесла еси во след Христа Жизнодавца.

Мы же, дивящися твоему смирению и послушанию, во умилении поем ти:
Радуйся, мира сего тленную красоту совершенно отвергшая;
Радуйся, славу его и богатство нивчтоже вменившая.
Радуйся, земнаго жительство скорогибнущия прелести отвергшая;
Радуйся, в нетленные одежды равноангельскаго жития облекшаяся.
Радуйся, яко свеща негасимая, любовь к Богу возженная;
Радуйся, яко роса небесная, благодатию Божиею напоенная.
Радуйся, миро благоуханное, добродетельми насыщенное;
Радуйся, розго многоплодное, от лозы, Христа, возвращенное.
Радуйся, богомудрая мати Софие, прехвальная молитвеннице земли Суздальския.

Кондак 3

Силою свыше вооружившися, противостала еси всем кознем диавольским; ты непрестанным пощением, псалмопением и терпением попраала еси древняго змия, имущи в сердце своем сладчайшее имя Иисуса, и тем обрела еси покой душе своей, в благодарении Богу зовущи:
Аллилуия.

Икос 3

Имущи боголюбивую душу, взыскала еси Царствия Небеснаго и правды его; неустанным деланием правил монашескаго жития восходила еси от силу в силу и достигла еси высоты совершенства в меру полного возраста духовнаго. Мы же, славяще твоя труды и добродетели, сице тебе поем:

Радуйся, вся искушения вражеская силою свыше победившая;

Радуйся, похоть плоти многим воздержанием умертвившая.

Радуйся, похоть очес непрестанною молитвою угасившая;

Радуйся, гордость житейскую нелицемерным смирением искоренившая.

Радуйся, яко добропобедно взошла еси на гору святости;

Радуйся, яко узрела еси очима души обители небесная.

Радуйся, горлица чистая, к Божественным чертогам взлетевшая;

Радуйся, кроткая голубице, к Богу вознесшаяся.

Радуйся, богомудрая мати Софие, прехвальная молитвеннице земли Суздальския.

Кондак 4

Бурю помышлений претерпела еси, преподобная мати Софие, егда направила еси стопы своя

путем иноческого жития, обаче скоро познала еси душею неизглаголанную радость общения со Христом в непрестанных трудах поста, бдения и молитв и в мире сердца своего прославила еси Всещедраго Бога, поющи: Аллилуия.

Икос 4

Слышавше о мнозех бедах и мятежах жительство суетнаго мира, утешалася еси Божиим изволением, данным тебе жребием монашескаго бытия. Темже славяще твое благочестное житие в подвизех послушания, целомудрия и нестяжания, воспеваем тебе сицевая:

Радуйся, волею Божиею от мира во обитель благоотишную пресельшаяся;

Радуйся, тамо сокровище нетленное неложно себе стяжавшая.

Радуйся, яко жена потерянную драхму жития во Христе иночеством нашедшая;

Радуйся, подобне купцу богатство, честь и славу на бисер Царства Небеснаго пременившая.

Радуйся, яко тамо сердце твое, идеже сокровище твое;

Радуйся, яко скрыла оное на Небеси, идеже червь не тлит.

Радуйся, зерно горушично, доброделанием в велие древо взрастившееся;

Радуйся, яко семя словес Христовых богате

уплодоносила еси.

Радуйся, богомудрая мати Софие, прехвальная молитвеннице земли Суздальския.

Кондак 5

Богозданную обитель во имя Покрова Божия Матере возлюбила еси всею душею твоею, под священный Ея омофор всельшаяся, и святым водительством Царицы Небесныя обрела еси покой и сладость душевную, и Сыну Ея Христу Богу воспела еси благодарственную песнь, зовущи: Аллилуия.

Икос 5

Видевши путь к Царствию Небесному, предначертанный Христом во Святем Евангелии, непоколебимо шествовала еси стезями богоугоднаго жития и достигла еси неизреченных благ, уготованных Богом любящим Его. Мы же, назидаемии твоим добрым житием, воспеваем ти:

Радуйся, прежде всего Царствия Небеснаго искавшая;

Радуйся, чаяние жизни будущаго века исповедовавшая.

Радуйся, заповеди Новаго Завета в жительстве исполнившая;

Радуйся, к нищим духом себе присовокупившая.

Радуйся, с плачущими в покаянии утешение себе обретшая;

Радуйся, преподобная, с кроткими блаженство унаследовавшая.

Радуйся, с алчущими правды Божия зело насыщенная;

Радуйся, с милостивыми от Бога помилование получившая.

Радуйся, богомудрая мати Софие, прехвальная молитвеннице земли Суздальския.

Кондак 6

Проповеда земля Суздальская твое изрядное житие, во мнозех добродетелех процветшее; мирстии людие текоша к тебе, да узрят тя, духовне совершенную, и слышат душеспасительныя глаголы твоих богомудрых уст, в благодарении Богу зовущи: Аллилуия.

Икос 6

Возсия свет благодати подвигов твоих, просвещающий всякаго человека, грядущаго ко святей обители Покрова Божия Матери на поклонение, да примут zde хотящии спастися помощь твоими молитвами от Всещедраго Бога, внемлющаго гласу моления угодников Своих.

Сего ради возглашаем ти:

Радуйся, Богом Светодавцем в иноческих трудех просвещение;

Радуйся, огнем святости людям приходящим
возсиявшая.

Радуйся, свещнице, не под спудом, но вверху
стоящая;

Радуйся, лучами Солнца Правды вся
блистающая.

Радуйся, в нощи грехов людских тьму
погибельную прогоняющая;

Радуйся, яко сидящи во тьме греха видят свет
твоего жития.

Радуйся, тако просветившаяся пред человеки
светом души твоея;

Радуйся, тако прославившая Отца милости и
щедрот, Иже есть на Небесех.

Радуйся, богомудрая мати Софие, прехвальная
молитвеннице земли Суздальския.

Кондак 7

Хотящи последовати Искупителю рода
человеческаго, рекшему: «Аще кто хочет по Мне
ити, да отвержется себе и возмет крест свой, и
по Мне грядет», возненавидела еси вся красная
земных благ и всею крепостию души своея
возлюбила еси Сладчайшего Иисуса, поющи:
Аллилуия.

Икос 7

Дивную тя во святых показа Христос Бог,
сподобивый ангельскаго чина прияти и нареци

тя Софию, тезоименитая Премудрости Божией, да будешь великая и неизреченная домостроительства Божия тайны, да ведаешь и благая вечная, да Царство Небесное наследуешь со всеми небожителями. Мы же таковому Божию изволению чудящися, зовем ти: Радуйся, Божественнаго промысления достойная избраннице; Радуйся, света небеснаго земное зеркало. Радуйся, печати Премудрости Божия дивная носительнице; Радуйся, благодати Духа Святаго непорочное вместилище. Радуйся, сосуде златый чистоты душевныя и телесныя; Радуйся, образе честный иноческаго жития. Радуйся, ангельскому славословию непрестанными песнями подражавшая; Радуйся, деланьми благочестия на лествицу духовную возшедшая. Радуйся, богомудрая мати Софие, прехвальная молитвеннице земли Суздальския.

Кондак 8

Странное чудо видимо есть, како честь и хвалу века сего на тихое и безмолвное житие пременила еси и славное звание великия княгини смиренно сложила еси; едино, еже есть

на потребу, сие возлюбила еси, благодарственно гласом радования Богу поющи: Аллилуия.

Икос 8

Всю себе, яко Жениху, Господу Иисусу предавши, уподобилася еси мудрым девам, елеем добрых дел светильники своя исполнившим, и, бодрствующи, в радости сретила Его. Сего ради ублажаем тя сие: Радуйся, небесных чертогов богоизбранная наставнице;

Радуйся, обители горния преславная насельнице.

Радуйся, многими добродетельми путь свой к небеси уготовившая;

Радуйся, слезами, скорбьми и покаянием стези своя оросившая.

Радуйся, глас Жениха Небеснаго всерадостно услышавшая;

Радуйся, пира брачнаго жизни вечныя приобщившаяся.

Радуйся, Божественнаго рая сладость вкусившая;

Радуйся, света невечерняго приснотекущую радость восприявшая.

Радуйся, богомудрая мати Софие, прехвальная молитвеннице земли Суздальския.

Кондак 9

Всякое плотское мудрование в себе упразднила еси силою Божественных благодати, сораспявши себя Христу со страстьми и похотьми, добре в иночестве пожила еси; темже и была еси яко древо, насажденное при исходящих вод, приносящи мног плод Богу Жизнодателю, поющи: Аллилуия.

Икос 9

Вития многоглаголивая не возмогут изрещи твоя труды сокровенныя, подвиги и благодеяния, ими же угодила еси Богу, Прославляющему прославльших Его, Иже содела тя нарочитым сосудом благодати Своея, из него же преизливаются чудеса всем тя воспевающим: Радуйся, Премудрости Божия житием своим проповеднице; Радуйся, благости Божией в человецех свидетельнице. Радуйся, любви Божия невредимое хранилище; Радуйся, милосердия Божия достохвальное приятелище. Радуйся, яко тобою славится Бог, дивный во святых Своих; Радуйся, яко тобою посрамляется отец лжи диавол. Радуйся, смирением своим Богом вознесенная; Радуйся, чистотою сердца своего Господом

прославленная.

Радуйся, богомудрая мати Софие, прехвальная молитвеннице земли Суздальския.

Кондак 10

Спаси хотя всякаго человека, великодаровитый Господь управи житие твое, преподобная мати Софие, и благослови твоя стопы исправити к деланию заповедей Своих. Ты же, яко благопослушливая раба Господня, в смиренномудрии познала еси волю Небеснаго Домовладыки Христа и исполнила вся заповеданная Им, воспевши с радостию:
Аллилуия.

Икос 10

Стена неборимая бысть тебе всемогущий Покров Пресвятыя Богородицы, препобедила еси вся искушения духов злобы, облекшися в броню правды, и угасила еси разженные стрелы лукаваго, взявши щит веры. Сего ради восхваляем тя сице:

Радуйся, Пресвятыя Богородицы усердная почитательнице;

Радуйся, всечестнаго Покрова Ея неумолкаемое хваление.

Радуйся, возлюбленная дочери Царицы Небесныя;

Радуйся, ревностная печальнице пред Нею за

вся единовѣрныя.

Радуйся, смиренію Девы Маріи благочестне
учившаяся;

Радуйся, Ея святейшему послушанію
неленостно последовавшая.

Радуйся, всеблаженным Ея омофором во
иночествѣ утвержденная;

Радуйся, милостію Богородицы вся обеты
монашества соблюдающая.

Радуйся, богомудрая мати Софіе, прехвальная
молитвеннице земли Суздальския.

Кондак 11

Пением чудес, от твоихъ молитвъ проистекших,
утешаемся, о преподобная мати Софіе,
величаемъ твои подвиги, ихъ же неослабно понесла
еси до послѣдняго издыханія. Егда же скончала
еси поприще земнаго живота своего,
преселилася душою въ небесныя жилища и тамо
воспеваеши Царю царствующихъ хвалебную
песнь: Аллилуія.

Икос 11

Светопріемную свѣцу славы Божія зримъ тя, во
тьмѣ греховъ нашихъ свѣтящую, и ко святей иконѣ
твоей, надеющихся на твое вспоможеніе,
притекаемъ, и къ раце мощей твоихъ съ верою и
любовію припадаемъ, воспевающе тебѣ таковая:
Радуйся, яко подвигомъ добрымъ подвизалася

еси;

Радуйся, яко течение земнаго жительствова
доблественне скончала еси.

Радуйся, яко веру правую нелицемерно соблюла
еси;

Радуйся, яко в радость Господа твоего достойно
взошла еси.

Радуйся, жизни вечныя красоту узревшая;

Радуйся, доброту неизреченную в селениих
вышних обретшая.

Радуйся, с чины ангельскими немолчно
ликующая;

Радуйся, со всеми святыми Бога Творца
славословящая.

Радуйся, богомудрая мати Софие, прехвальная
молитвеннице земли Суздальския.

Кондак 12

Благодати чудо явила еси ныне: грех наших
ради по многолетии судом Божиим попущеннаго
запустения обитель сию Покрова Богородицы,
юже во граде Суздали, твоим предстательством,
праведная мати Софие, Господь паки возроди и
дарова ю ищущим спасение, да вси
благодарственно поют Богу: Аллилуия.

Икос 12

Поющи твоя новая чудеса, блаженная мати
Софие, почитаем твою пречестную память,

твоим бо непрестанным тщанием и небесными молитвами пред Престолом Божиим святая обитель, в ней же ты телом почиваеши, вновь создается и милостию Царицы Небесных новым стадом монашествующих обильно населяется. Поминаючи твоя таковая благодеяния, приносим тебе песнь сию:

Радуйся, своим попечением обитель сию не оставившая;

Радуйся, дерзновенным ходатайством пред Богом о ней болезнующая.

Радуйся, яко твоим предстательством новыя свечи иночества zde возгораются;

Радуйся, яко твоими молитвами токи благодати Божия заблудшия во граде Суздале к Церкви обращают.

Радуйся, обители сия присная хранительнице;

Радуйся, иночествующих в ней незримая наставнице.

Радуйся, прибегающим к тебе в молитвах скорая помощнице;

Радуйся, чудес многообразных неоскудеваемый источнице.

Радуйся, богомудрая мати Софие, прехвальная молитвеннице земли Суздальския.

Кондак 13

О, святая и богомудрая угоднице Божия, преподобная мати Софие, прими

благодарственную песнь, тебе ныне возносимую недостойными устами нашими. Не забуди молений и прошений всех, чтущих твое святое имя и с любовью ублажающих твою пречестную память. Не остави сию обитель нашу, но сохрани ю целою в часы бед и напастей, да вси вкупе сподобимся воспевати хвалу Богу Спасителю нашему, верою зовущим: Аллилуия. Этот Кондак читается трижды, затем Икос 1 и Кондак 1.

